

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- जम्मू कश्मीर विधानसभा नै प्रदेश दा विशेष दर्जा ब्हाल करने लेई कल इक प्रस्ताह पास कीता ऐ।
- मुख्यमंत्री उमर अब्दुल्ला होरें आखेआ जे विधानसभा नै अपना कम्म कीता ऐ। बीजेपी नै इस प्रस्ताह खलाफ प्रदर्शन कीता।
- केन्द्री मंत्रिमंडल नै विद्यालक्ष्मी स्कीम गी मंजूरी दित्ती जेह्दे नै काबल विद्यार्थिएं गी पढ़ाई लेई माली समर्थन थ्होग।
- केन्द्री गृहमंत्री अमित शाह होरें आखेआ ऐ जे मोदी सरकार आतंकवाद मुक्त भारत बनाने लेई दृढ़ संकल्प ते आतंकवाद गी दना बर्दाश्त नेई करने आली नीति पर कायम ऐ।
- डोनाल्ड ट्रंप अमरीका दे 47^{में} राष्ट्रपति बने। प्रधानमंत्री नरेन्द्र मोदी होरें उनेंगी ममारकबाद दित्ती।
- होर पन्शनरें दी सुविधा लेई डिजीटल लाईफ सर्टिफिकेट अभियान दे त्रीए गेड़ दी शुरुआत।

<><><><><><>

J&K Resolution

जम्मू-कश्मीर विधानसभा नै केंद्र शासित प्रदेश लेई विशेष दर्जे ते संवैधानिक गरंटिएं दी मंग आहला इक प्रस्ताऽ कल पास करी दित्ता। कल जि'आं गै सदन दी बैठक लग्गी तां उप-मुख्यमंत्री सुरिंद्र चौधरी होरें एह प्रस्ताऽ सदन च रखेआ ते सेहत, शिक्षा ते समाज कल्याण मैह्कमें दिएं मंत्री सकीना इत्तू होरें एहदा समर्थन कीता। इस प्रस्ताऽ च सदन अग्गे एह मंग बी कीती गेई ऐ जे ओह केंद्र सरकार गी गुजारश करै जे ओह विशेष दर्जा ते संविधानिक गरंटिएं गी ब्हाल करने लेई जम्मू-कश्मीर च लोकें आसेआ चुने गेदे नुमाइंदें कन्नै गल्लबात शुरू करै ते इनें प्रावधानें गी ब्हाल करने ताई संवैधानिक बवस्थाएं पर कम्म करै। स्पीकर अब्दुल रहीम राथर होरें इस प्रस्ताऽ लेई ध्वनिमत कन्नै वोटिंग कराई ते सदन नै इसगी पास करी दित्ता। इस प्रस्ताव च एह आखेआ गेदा ऐ जे विशेष दर्जे दी ब्हाली आहली कुसै बी प्रक्रिया दे तैह्त् राष्ट्री एकता ते जम्मू-कश्मीर दे लोकें दिएं जायज आसें-तांगें, दौनें दी गै राक्खी जकीनी बनाई जानी लोडचदी ऐ।

एहदे शा पैहले बीजेपी दे सुनील शर्मा हुंदी अगुवाई च विपक्ष नै एहदा बरोध कीता ते जारी हंगामें गी दिखदे होई स्पीकर होरें सदन दी कार्रवाई गी दिन भरै लेई स्थगित करी दित्ता।

<><><><><><>

Omar-Resolution

मुख्यमंत्री ओमर अब्दुल्ला होरें आखेआ ऐ जे जम्मू-कश्मीर दे विशेष दर्जे दी बहाली लेई केंद्र सरकार ते जम्मू-कश्मीर च लोकें आसेआ चुने गेदे नुमाइंदें बश्कार गल्लबात दी मंग आह्ला प्रस्ताऽ पास करियै विधानसभा नै अपना कम्म करी दित्ता ऐ। इस प्रस्ताऽ च जम्मू-कश्मीर दा विशेष दर्जा इकतरफा हटाए जाने पर चैता बुज्झी गेदी ऐ। इस प्रस्ताव गी बिजन कुसै चर्चा दे ध्वनि मत कन्नै गै पास करी दित्ता गेआ।

<><><><><><>

BJP

भारती जनता पार्टी दी जम्मू-कश्मीर इकाई नै जम्मू-कश्मीर दे विशेष दर्जे दी बहाली बारै विधानसभा आसेआ पास कीते गेदे प्रस्ताव दी निंदआ लेई कल बरोध प्रदर्शन कीता। इस प्रस्ताऽ च जम्मू-कश्मीर दे विशेष दर्जे दी बहाली लेई केंद्र सरकार ते प्रदेश दे चुने गेदे नुमाइंदें बश्कार गल्लबात दी मंग कीती गेदी ऐ। पार्टी दे प्रदेश प्रधान सत शर्मा हुंदी अगुवाई च बीजेपी कार्यकर्ताएं दे इक समूह नै त्रिकुटा नगर च पार्टी हैडक्वार्टर दे बाहर धरना-प्रदर्शन कीता। इस मौके पर उनें मुख्यमंत्री उमर अब्दुल्ला ते उपमुख्यमंत्री सुरिंद्र चौधरी हुंदे पुतले फूके ते नेशनल कांफ्रेंस दी अगुवाई आहली जम्मू-कश्मीर सरकार दे खलाफ नारेबाजी बी कीती।

<><><><><><>

Cabinet

केन्द्र सरकारै बड़े मते प्रतिभाशाली विद्यार्थिएं गी माली मदाद उपलब्ध करोआने लेई पी.एम विद्यालक्ष्मी योजना गी मंतूरी दित्ती ऐ। कैबिनेट दी बैठक च लैते गेदे फैसलें बारे कल नमीं दिल्ली च मीडिया गी जानकारी दिंदे होई सूचना ते प्रसारण मंत्री अश्विनी वैष्णव होरें आखेआ जे विद्यार्थिएं गी बिजन कुसै शर्ते दे गरंटी मुक्त दोआर हासल होग तां जे ओह उच्च शिक्षा हासल करी सकन। सरकारै भारती खाद्य निगम-एफसीआई च 10 ज्हार 700 करोड़ रपे दी इक्यूटी पाने दा बी फैसला कीता ऐ। मीडिया गी जानकारी दिंदे होई अश्विनी वैष्णव होरें दस्सेआ जे एफसीआई अन्नदाने दी खुश-खरीद च बड़ी बड्डी भूमका नभांदी ऐ ते इस करियै सरकारै एफसीआई गी सशक्त बनाने दा फैसला लैता ऐ।

प्रेधानमंत्री नरेन्द्र मोदी होरें एफसीआई च 10 ज्हार 700 करोड़ रुपें दी इक्यूटी पाने दे कैबिनेट दे फैसले दी सराहना कीती ऐ। श्री मोदी होरें नोजवानें गी मय्यारी शिक्षा उपलब्ध करोआने लेई पी.एम-विद्यालक्ष्मी योजना गी मंजूरी दित्ते जाने दी सराहना कीती ऐ। उनें आखेआ जे एह योजना युवा-शक्ति गी मजबूत करने ते राश्र दे उज्जवल भविष्य दे निर्माण दी दिशा च बड्डी गैह ऐ।

<><><><><><>

Amit Shah

केन्द्रीय गृहमंत्री अमित शाह होरें आखेआ ऐ जे मोदी सरकार भारत गी आतंकवाद मुक्त करने ते आतंकवाद गी बिंद बी नेई बर्दाश्त करने आली नीति दे प्रति वचन बज्झी दी ऐ। शाह होरें सोशल मीडिया पर इक पोस्ट राहें आखेआ जे आतंकवाद रोधी सम्मेलन च मुख्य दी सुरक्षा गी मजबूत करने च बक्ख-बक्ख अर्जेसिएं बश्कार तालमेल बधाने दे उपाऽ कीते जाडन। नमीं दिल्ली च अज्जै थमां शुरु होने आले इस सम्मेलन गी गृहमंत्री होर संबोधत करगन। एह्दे च संगठित तरीके कन्नै आतंकवाद दा मुकाबला करने च बक्ख-बक्ख सरबंघत धड़ें बश्कार तालमेल बनाने बक्खी चेचा ध्यान दित्ता जाग। सम्मेलन दरान पुलस ते केन्द्री एर्जेसिएं दे वरिष्ठ अधिकारी ते विधि, फॉरेंसिक ते टेक्नोलाजी खेत्तर दे माहिर महत्वपूर्ण मामलें पर विचार बटांदरा करडन। इंदे च आतंकवाद दी रोकथाम आस्तै कानूनी ढांचा ते नमीं उभरदी तकनीकें सरबंधी चुनौतिएं ज्नेय मामले शामिल होडन। भारत दे बाहरै थमां चलाए जा'रदे आतंकवादी नेटवर्क गी खत्म करने आस्तै अंतर्राष्ट्री कनूनी सैहयोग ते नीतिएं पर बी विचार बटांदरा कीता जाग। एह्दा मकसद नीति निर्माण आस्तै महत्वपूर्ण जानकारी किट्ठी करना ऐ।

<><><><><><>

Motivational Lecture

फौज आस्सेआ राजौरी जिले च सरकारी हायर सैकेंडरी स्कूल सोलंकी ते पुंछ दे दारा दुल्लियां च इक प्राइवेट स्कूल च विशेष प्रेरणा देने आले लैक्चरें दा सरिस्ता कीता गेआ। जिस दरान इक विशिष्ट बहादुरी पुरस्कार विजेता नै विद्यार्थिएं गी प्रेरणा देने आला लैक्चर दित्ता। इस दरान विद्यार्थिएं गी दलेरी, इमानदारी, किट्ठे रलियै कम्म करने, बक्ख-बक्ख परिस्थितिएं च प्रतिक्रिया करने ते होरने विषयें पर जानकारी दित्ती गई। एह्दे इलावा उने विद्यार्थिएं कन्नै फौज च कम्म करने दे अपने तजुर्बे बी सांझे कीते। एह्दे बाद सुआल जवाब आला इक गेड़ बी लग्गा जेह्दे च विद्यार्थिएं उंदे कोला सुआल पुच्छे। एह् आयोजन मुल्खै दी राखी करने आले नायकें प्रति इक श्रद्धांजलि ही जिन्नै नोजवानें गी फौज च जाने लेई प्रेरत बी कीता।

<><><><><><>

Trump

अमरीका च राष्ट्रपति चुनाएं च रिपब्लिक पार्टी दे डोनाल्ड ट्रंप होरें डेमोक्रेटिक पार्टी दी कमला हैरिस गी हराइयै जित्त हासल कीती ऐ। उनें 277 इलैक्टोरल कालेज वोट हासल करियै निर्मायक जित्त हासल कीती। राष्ट्रपति ओह्दे दे मेदवार गी जित्तने लेई 270 वोटें दी लोड़ ही। श्री ट्रंप दे विसकंसिन राज्य जित्तने कन्नै इलैक्टोरल कालेज वोट हासल करने मगरा रिपब्लिक पार्टी दे जश्न शुरू होई गे। ओह् अमरीका दे 47में राष्ट्रपति बने न। उनें पेन्सिलवेनिया, जोर्लिया, उत्तरी कैरोलीना सनें दुए राज्यें च बी जित्त हासल कीती। श्री ट्रंप हुंदे चुनां जित्तने मगरा दक्खन फ्लोरिडादे पाम-बीच च जित्त मगरा उनें अपने भाषण च दुनिया भर दे युद्ध खत्म करने लेई कम्म करने दे अपने प्रमुख नीतिगत निरणे दा संकेत दित्ता। उनें आखेआ ओह् युद्ध शुरू करन नेई जा'रदे, सगुआं उसी रोकने जा'रदे न। श्री ट्रंप होरें आखेआ जे अमरीका दे बन्ने सील करने ते अप्रवासिएं गी कनूनी रूपै कन्नै वापस औने दी जरूरत ऐ। उनें अपने चुनां प्रचार अभियान दे आदर्श वाक्य गी दोहराया ते दावा कीता जे उंदा कार्यकाल अमरीका लेई स्वर्ण युग होग।

<><><><><><>

PM-Trump

प्रधानमंत्री नरेन्द्र मोदी होरें डोनाल्ड ट्रंप हुंदे कन्नै गल्लबात करियै उनेंगी अमरीकी राष्ट्रपति चुनां च उंदी शानदार जित्त पर बधाई दित्ती ऐ। सोशल मीडियो पर अपनी इक पोस्ट च मोदी होरें आखेआ जे ओह् प्रौद्योगिकी, रक्षा, ऊर्जा, अंतरिक्ष ते केई होरने क्षेत्रें च भारत अमरीका सरबंधे गी होर मजबूत करने आस्तै इक बारी फही मिलियै कम्म करने आस्तै उत्सुक न। प्रधानमंत्री ते ट्रंप हुंदे बश्कार होई दी गल्लबात दरान दौनें नेताएं विश्व शांति आस्तै कम्म करने दी गल्ल आकखी ऐं गल्लबात दरान ट्रंप होरें आखेआ जे पूरी दुनिया मोदी हुंदे कन्नै प्यार करदी ऐ। डोनाल्ड ट्रंप होरें भारत गी इक शानदार मुख्य दस्सेआ। उनें आखेआ जे ओह् प्रधानमंत्री मोदी ते भारत गी अपना दोस्त मन्नदे न। ट्रंप होरें आखेआ जे प्रधानमंत्री मोदी, उनें पैहले नेताएं चा इक न जिंदे कन्नै उनें जित्त मगरा गल्ल कीती ऐ।

<><><><><><>

Jatinder Singh

अमले, सार्वजनिक शकैतें ते पेंशनरें सरबंधी मामले दे केन्द्री राज्य मंत्री डॉ. जितेन्द्र सिंह होर कल नमीं दिल्ली च राष्ट्रव्यापी डिजीटल जीवन प्रमाण पत्र अभियान दे त्रीए गेड़ गी शुरू करोआया। इस मौके पर बोलदे होई डॉ. सिंह होरें आखेआ जे पेंशनरें दे डिजीटल सशक्तिकरण लेई डिजीटल जीवन प्रमाण पत्र यानि जीवन प्रमाण-प्रधानमंत्री नरेन्द्र मोदी हुंदा नजरिया ऐ।

उनें दस्सेआ जे जीवन प्रमाण दी शुरूआत बरे 2014 च कीती गई ही ते फही 2021 च चेहरे दे प्रभामिणकरण दी सुविधा शुरू कीती गई ही। पैहले डिजीटल जीवन प्रमाण पत्र अभियान गी बरे 2022 च 37 शैहरें च लागू कीता गेआ हा। एहदे परेंत दुए डिजीटल जीवन प्रमाण पत्र अभियान गी पिछले बरे 100 शैहरें च अमल च आंदा गेआ हा ते इस बरे 800 शैहरे—कस्बें च एहदे 1900 कैप लाए जांगन ते 1100 शा मते नोडल अफसरें गी एहदे लेई नियुक्त कीता गेआ ऐ।

<><><><><><>

Kala Udhampur

जिला स्तरी कला उत्सव 2024–25 दे मुकाबलें दा आयोजन कल उधमपुर च जागते दे शहीद इंस्पेक्टर कमल सिंह मॉडल हायर सकेंडरी स्कूल च कीता गेआ। उप मुख शिक्षा अधिकारी डाक्टर कल्पना सशोदिया होर कार्यक्रम दिआं मुख परौहनियां हिआं। इस मौके अपने संबोधन च उनें आखेआ

<><><><><><>